

故宮博物院藏

四庫全書
撤出本
彙編

第九冊

故宮博物院編
故宮出版社

第九册 目錄

南北史合注卷六十七—卷七十五	一
卷六十七	三
卷六十八	三七
卷六十九	九一
卷七十	一六三
卷七十一	二〇九
卷七十二	三七一
卷七十三	三八九
卷七十四	四六三
卷七十五	五三九

欽定四庫全書

史部

南北史合注卷

六十七至
七十

第三分

欽定四庫全書

南北史合注卷六十七

明李清撰

南史六十七

蔡景歷
子微

華皎

毛喜

陸山才

謝岐

宗元饒

趙知禮

沈君理



趙知禮字齊旦天水隴西人父孝穆梁侯官令知禮涉獵文史善書翰陳武討元景仲或薦之引為書記知禮為文贍速每占授軍書下筆便就率皆稱旨由是恒侍左右深被委任當時計畫莫不預焉陳武征侯景至白茅灣上表於梁孝元及與王僧辯論軍事其文並知禮所製及景平授中書侍郎陳受命位太府卿王琳平就吳州刺史知禮沉靜有謀謨每軍國大事文帝輒令璽書問之再遷右將軍領前軍卒贈侍中諡曰忠子元恭

嗣

蔡景歷字茂世濟陽考城人父大同岳陽王譽記室參
軍景歷少俊爽有孝行家貧好學善尺牘工草隸為海
陽令政有能名在侯景中與南康嗣王會理通謀匡復
陳書曰梁簡文為景所幽景歷與南康嗣王會理謀
挾簡文出奔

事泄被執賊黨王偉保護之獲免因客游京口景平陳
武鎮朱方素聞其名以書要之景歷對使人答書筆不

停輟文無所改

陳書載景歷書曰竊以世求名駿行地能致千里時
愛奇寶照車遂有徑寸但雲咸斯奏自輟已渝杞梓
方雕豈眎樗櫟仰惟明將軍誓勤王之師摠義夫之
力鯨鯢式剪役不踰時是以天下之人向風慕義或
帝室英賢貴游令望齊楚秀異荆吳岐嶷武夫則陸
拔山岳水斷蚪龍六鈞之弓左右馳射萬人之劍短
兵交接攻壘若文鴛焚艦如黃蓋百戰百勝貔貅為

羣文人則雕麗輝煥摘掞絢藻子雲不能抗其筆元
瑜無以高其記尺翰馳而聊城下清談奮而羸軍却
復有三河辨客改哀樂於須臾六奇謀士斷變反於
瞬息治民如子賤折獄如仲由直言如毛遂衝使若
相如懷恩抱義感恩徇己海內雄賢牢籠斯備至如
走賊安庸人耳自陽九遭厄天步艱阻溺於巨寇備
踐薄冰今王道中興獲存微命方歡飲啄是謂來蘓
竊服高義暫謁門下明將軍管削不棄折簡賜留欲

以雞鶩廁鴛鴦於池沼將移瓦礫參金碧之聲價昔
折脅入秦忽逢盼睐擔簦入趙便致留連方之非匹
何用克堪眇眇織羅憑喬松以自聳蠢蠢輕蚶托驂
尾而遠鶩竊不自涯願備下走且為腹背之毛脫充
鳴吠之數

陳武得書甚加欽賞即日授征北府中記室參軍仍領
記室衡陽王昌為吳興太守陳武以鄉里父老尊卑有
數恐昌年小接對乖禮乃遣景歷輔之承聖中還掌記

室陳武將攻王僧辯獨與侯安都等數人謀之景歷勿之知部分既畢召入草檄景歷援筆立成辭義感激事皆稱旨及受禪遷秘書監中書通事舍人掌詔誥永定二年坐妻弟受周寶安餉馬降中書侍郎三年武帝崩時外有強寇文帝方鎮南皖朝無重臣宣后呼景歷及江大權杜稜定議祕不發喪疾召文帝景歷躬共宦者及內人密營歛服時既暑熱須營梓宮恐斤斧之聲聞外乃以蠟為祕器文詔依舊宣行文帝即位復為秘書

監令人如故以定策功封新豐縣子累遷散騎常侍文
帝誅侯安都景歷勸成其事以功遷太子左衛率進爵
為侯常侍舍人如故坐妻兄劉洽依倚景歷權前後姦
詭并受歐陽威餉絹百匹免官華皎反以景歷為武勝
將軍吳明徹軍司皎平明徹於軍中輒戮安成內史楊
文通又受降人物仗有不分明景歷又坐不能匡正被
收久之獲宥孝宣即位累遷通直散騎常侍中書通事
舍人掌詔誥仍復封邑太建五年都督吳明徹北侵所

向克捷大破周梁士彥於呂梁方進圍彭城時孝宣銳
意河南謂指麾可定景歷稱師老將驕不宜過窮遠略
帝惡其沮衆大怒猶以朝廷舊臣不加深罪出為豫章
內史未行為飛章所劾以在省贓污狼籍帝令有司案
問景歷但承其半於是御史中丞宗元饒奏免景歷所
居官徙居會稽及明徹敗帝追憶景歷前言即日追還
以為征南鄱陽王伯山諮議數日遷員外散騎常侍兼
御史中丞復本爵封入守度支尚書舊式拜官在午後

景歷拜日適逢輿駕幸玄武觀在位皆倚宴帝恐景歷
不預特令早拜其見重如此卒官贈太常卿謚曰敬十
三年改葬重贈中領軍禎明元年配享武帝廟庭二年
車駕幸其宅重贈景歷侍中中撫軍將軍謚忠敬給鼓
吹一部於墓所立碑景歷屬文不尚雕靡而長於叙事
應機敏速為當時所稱有集三十卷子徵嗣徵字希祥
幼聰敏精識強記年六歲詣梁吏部尚書河南褚翔翔
嗟其穎悟七歲丁母憂居喪知成人禮繼母劉氏性悍

忌視之不以道徵供事益謹初無怨色徵本名覽景歷
以其有王祥之性更名字焉陳武為南徐州召補迎主
簿尋授太學博士太建中累遷太子中舍人兼東宮領
直襲新豐侯至德中累左民尚書與僕射江總知撰五
禮事後主器其才幹任寄日重遷吏部尚書每十日一
往東宮於皇太子前論述古今得喪及當時政務又敕
以廷尉寺獄事無大小取徵議決俄敕遣徵收募兵士
自為部曲徵善撫卹得物情旬月間衆近一萬位望既

重兼聲位熏灼物議咸忌彈之尋徙中書令中書清簡
無事或云徵有怨言後主聞之大怒收奪人馬將誅之
左右致諫獲免禎明二年隋軍濟江後主以徵有幹用
令權知中領軍事徵日夜勤苦備盡心力後主嘉焉謂
曰事寧有以相報及決戰於鍾山南岡敕徵守宮城西
北大營尋令督衆軍戰事陳亡隨例入長安徵美容儀
有口辯多所詳究至於士流官室宗室戚屬及當朝制
度憲章儀軌戶口風俗山川土地問無不對然性頗便

佞進取不能以退素自業初拜吏部尚書啟後主借鼓吹後主謂所司曰鼓吹軍樂有功乃授蔡徵不自揆量紊我朝章然其父景歷既有締構功宜且如啟拜訖即追還徵不脩廉隅皆此類隋文帝聞其敏贍召見顧問言輒會旨然累年不調久之除太常丞歷給事郎卒

宗元饒南郡江陵人少好學以孝聞仕梁為征南府外兵參軍及司徒王僧辯幕府初建元饒與沛國劉師知同為主簿陳武受禪稍遷廷尉卿尚書左丞孝宣初軍